



Damain pernottaziuns a Tarasp e Vulpera

L'onn passà ha Tarasp Vulpera nudà 105 000 pernottaziuns, avant 15 onns eran quai anc 150 000.

7



Diari da viadi or da l'Africa dal sid

Romina Beeli da la Val Schons è actualmain sin viadi en l'Africa dal sid e rapporta.

8

DIE SÜDOSTSCHWEIZ

LA QUOTIDIANA

Redacziun: Via comerciala 22, 7007 Cuira, tel. 081 920 07 10, fax 081 920 07 15

Medel: In seminari pils catschadurs

■ (anr/hh) La Secziun da catschadurs Vallatscha ha arranschau da cuort in seminar per sias commembres, mo era per ulteriurs interessents. 24 dels ein separticipai e han gudiu in avon miezdi zun instructiv. Differents referents han procurau per l'informaziun ed aschia clamau en memoria enqual detagl. Il focus dil seminari ei vegnius daus al sedepurtar dil catschadur avon e suenter il siet, sco era igl agir correct enten sventerlar igl animal sittau. Entginas indicaziuns davart la lescha e las prescripziuns da catscha han medemamein buca muncau.

Preparativas per la catscha

La Secziun da catschadurs Vallatscha/Medel ha organisau in seminari intern

■ (anr/hh) La catscha s'avischina e schegie ch'ella ei omnipresenta el cerchel dils catschadurs ein las preparativas per quella tonaton indispensablas. Leutier surveschan pli e pli era seminaris. In tal ha la Secziun da catschadurs Vallatscha/Medel pur-schiu dacuort a sias commembraas e ses commembers. Tgi che vul acquistar la legitimaziun d'ir alla catscha el cantun Grischun sto frequentar igl examen. Quel cumpeglia laver da tgira, ina part cun tir ed ina teoretica. Cheu emprendan las candidatas ed ils candidats tut quei ch'els ston saver per ademplir las prescrizions e leschas da catscha. La pratica recaltgan els allura el territori, ina part cun amitgs ni enconuschents avon la patenta, in'autra – la principala – quei mument che quella ei acquistada. La savida ch'in catschadur sto recaltgar ei multifara. Ella semova dalla higiena dalla carn entochen tier la ballistica e segns d'in animal blessau. Ina scolaziun sin quels secturs ei impurtonta, ina perfecziun medemamein. Era ils catschadurs ston adina puspei far persenn ch'ins ha mai empriu ora.

Plirs posts e referents

Per ademplir ils criteris d'ina perfecziun ha la Secziun da catschadurs Vallatscha/Medel offeriu dacuort a sias commembraas e ses commembers sco era ulteriurs interessents in seminari da catscha. Remo e Patricia Giger, René Levy (meinatgauns da saung), Beno Pally (mazler) e Daniel Bundi (guardiaselvachina) han referiu sils differents posts. 24 participantas e participonts han gu-

diu l'instrucziun. Damondas han buca muncau. Savens caschunan adina las medemas damondas discussiuns. Co eis ei da secuntener sin la catscha entuorn in asil? Tgei eis ei da far sch'in animal bles-sau serenda egl asil e va alla malura leu sin distanza da vesida dil catschadur? Tgei, sch'ins vesa buc el? Astga la buis vegnir transportada egl asil ed astga ei vegnir sittau leu? Astg'ins star en in asil da muntanialas e sittar naven da leu ina muntaniala che sesanfla ordeifer quei asil? Co duei la buis vegnir pertada? Cu

descargar ella? Co eis ei da secuntener ella gruppera cun plirs uaffens? Ina regla ei clara: La buis sto vegnir pertada aschia che la conna mira encunter tschiel. Suenter haver cargau la buis suenter in siet sto quella vegnir segirada aschilunsch che quei succeda buc automaticamein.

Avon e suenter il siet

Ina dallas premissas per ir alla catscha ein il trenament regular da sittar e l'enconuschentscha dalla ballistica. Sin funda-

ment dalla reacciun digl animal sil siet sto il catschadur saver giudicar con bein e nua ch'el ha tuccau quel. Quei ei buc adina sempel, essend ch'igl animal sa reagir sin differentas modas tiel medem siet. Tgei ei in bien siet? La posiziun digl animal, sco era quella dil catschadur, ston constar avon il siet. Medemamein sto la lingia dil siet esser libra. Vid in cavriel ch'ei ius alla malura tier in accident ein quater siets vegni simulai. Siet da missiala, comba, venter e scaffa. Sin fundament dils mussaments avon maun sin la teila

alva rasada davos igl animal ei vegniu discusiunau nua ch'il siet savessi esser. Quei ei impurtont da comunicar al menader d'in tgaun da saung, aschilunsch ch'igl animal ei fugius suenter il siet. Fetg impurtont eis ei era da buca passar entuorn memia fetg el liug dil siet, perencunter marcar quel. Al meinatgaun ei la situaziun da declarar claramein. En quei connex astga ei buca dar misteris.

Neginas spungias

Sittar la selvaschina conform all'etica e las prescrizions ei mo ina part dalla catscha. In'autra ei il dretg manual vid la selvaschina sittada. Cun agid d'in cavriel ch'ei daventaus l'unfrenda d'in accident e che la survigilonza da catscha ha mess a disposiziun per il seminari ei vegniu mussau co sventerlar igl animal. Differents detags da quella incumenza vegnan savens tralaschai, sco per exemplu igl allontanar la ruosna-tgil dalla selvaschina per che la part davos digl animal stenschi buca. Il mazler cussiglia da desister d'aua, lumpas e spungias. Igl animal sventerlau duei vegnir transportaus aschi sper sco pusseivel en mazalaria. Dir, lom e narunchels duein vegnir consumai suettamein dad animals giuvens. Il president dalla Secziun da catschadurs Vallatscha, Ursin Venzin, ei cuntents cun la participaziun ed il seminari: «Malgrad la schliata aura han tutt laschau plascher igl avonmiezd. Ils participonts ein stai interessai, quei che ha menau a buns discuors. La fin finala ei quei seminari era staus ina buna caschun da promover la cuminanza ella seziun.»



In da differents posts cun referents.